

摘藻堂四庫全書薈要

集部

欽定四庫全書薈要

集部

劔南詩彙卷九

十九

詳校官助教臣謝登雋



欽定四庫全書薈要卷一萬五千四百九十九

集部

劔南詩彙卷九

宋 陸游 撰

夜飲

引劔酣歌亦壯哉
要君共覆手中盃
秋鴻陣密橫江去
暮角聲酣戰雨來
莫恨皇天無老眼
請看白骨有青苔
中年倍覺流光速
行矣西郊又見梅

暮秋

時序中年速風霜客路長孤愁巴月白清夢楚山蒼燈
暗秋銜壁鐘疎夜殷床端居有微祿不敢恨殊方

又

萬里歸無策八年淹此留羞蒙子公力寧倦長卿遊聽
雨瀟湘夜飛鷹鄴杜秋更須論富貴此計亦悠悠

夜雨有感

北風吹雨暗江郊十月僧廬旋補茆病馬敢希三品料
驚禽聊借一枝巢少時諸老爭求識晚歲殊方罕定交

閉戶不妨新得趣
丹經盈篋手親抄

道室

一室冷如水人疑在定僧
手稱丹竈火紗護佛龕燈食
減形雖槁心虛氣自凝
平生坐忘論字字欲銘膺

飯罷戲作

南市沽濁醪浮螿甘不壞
東門買坵骨醢醬點橙鱠
蒸雞最知名美不數魚蟹
輪困犀浦芋石碩落新都菜
欲饜老饕賦畏破頭陀戒
况予齒日疎大嚼敢屢嘬
杜老死

牛鬲千古懲禍敗閉門餌朝霞無病亦無債

初冬夜宴

絲管紛紛燭滿堂
臬盧擲罷夜飛觴
帷屏風定歌雲暝
香獸煙濃漏箭長
泛菊已成前日夢
探梅又續去年狂
醉歸自笑推頰甚
冷逼貂裘怯曉霜

冬夜醉歸復小飲

野外歸來晚空庭露氣新
乍晴雲妬月多病酒欺人
倚杖行吟久投盃起舞頻
早梅消息動春事漸闌身

病酒述懷

閒處天教著放翁
草廬高臥竹橋東
數莖白髮悲秋後
一醜青燈病酒中
李廣射歸關月墮
劉琨嘯罷塞雲空
古人意氣憑君看
不待功成固已雄

數日暄妍頗有春意予閒居無日不出遊戲作

小春花蕾索春饒
已有暄風入紫貂
村路雨晴鳩婦
喜射場草綠雉媒嬌
花邊結客飛金勒
樓上誰家弄

玉簫莫怪夕陽歸
獨後早梅喚我度谿橋

蜀宣華苑
在摩訶池

上

遣興

者舊日凋謝將如此老何憊拈如意舞狂叩唾壺歌郡
縣輕民力封疆恃議和功名莫看鏡吾意已蹉跎

趙將軍

并序

客為予言靖康建炎間關中奇士趙宗印者
提義兵勤王有衆數千所向輒下皆不敢當
會王師敗於富平宗印知事不濟大慟於王

景畧廟盡以金帛散其下被髮入華山不知所
終予感其事為作此詩

我夢遊太華雲開千仞青擘山瀉黃河萬古仰巨
靈往者旣亂初氛侵干太寧豈無臥雲龍一起奔風
霆時事方錯謬三秦盡血腥山河銷王氣原堊失大
刑將軍散髮去短劍斲茯苓定知三峰上爛醉今未

醒

江樓醉中作

淋漓百榼宴江樓秉燭揮毫氣尚遒天上但聞星主
酒人間寧有地理憂生希李廣名飛將死慕劉伶贈
醉侯戲語佳人頻一笑錦城已是六年留

退之詩云
越女一笑

三年
留

曳策

遊房
園作

慈竹蕭森拱廢臺醉歸曳策一徘徊紛紛落日牛羊下
黯黯長空霰雪來三峽猿催清淚落兩京梅傍戰塵開
客懷已是淒涼甚更聽城頭畫角哀

謁漢昭烈惠陵及諸葛公祠宇

雨止風益豪雪作雲不動淒涼漢陵廟衰草臥翁仲
畫妓空笙竽土馬闕鞵鞢壤沃黃犢耕柏密幽鳥哢尚
想忠武公身任社稷重整整渭上營氣已無岐雍少
須天意定破賊寧患衆興亡信有數星隕事可痛陵
邊四五家茆竹居接棟手斲紙上箔
居民皆以
造紙為業 醅熟
酒鳴甕雖嗟生理微亦足追饑凍劉葛固雄傑閱世
均一夢論高常近迂才大本難用九原不可作再拜

臨風慟

遙夜

遙夜雨聲急
惜惜窗戶幽
開編堯舜在
得句鬼神愁
同俗愚儒臯
容身壯士羞
燈殘不成睡
曉角動南樓

遠遊

遠遊行復歲
華新嬾學劉
郎問大鈞
一點不蒙稽
古力十分合
作臥雲身
苦寒與酒頓
增價小雨為
梅先辟塵
擬佩一壺江
路去花邊
醉墮白綸巾

大雪歌

崇日作雪竟不成戲賦此篇

長安城中三日雪
潼關道上行人絕
黃河鐵牛僵不動
承露金盤凍將折
虬鬚豪客狐白裘
夜來醉眠寶釵樓
五更未醒已上馬
衝雪却作南山遊
千年老虎獵不得
一箭橫穿雪皆赤
擎空爭死作雷吼
震動山林裂崖石
曳歸擁路千人觀
髑髏作枕皮蒙鞍
人間壯士有如此
胡不來歸漢天子

簡譚德稱

幼輿骨相稱山巖自要閒遊不避讒錦里先生為老伴
玉霄散更是頭銜探春苑路花綦帽看月江樓酒滿衫
惟恨題詩無逸氣媿君陣馬與風颿

排悶

世事何知與願違十年高臥看羣飛獵圍花市無人問
漁艇煙村有夢歸銀燭焰長搖酒浪寶刀佩穩壓戎衣
君看白首寒窗客俠氣縱橫亦未非

夜意

名姓人誰記形骸老漸侵
酒慳停劇飲詩退負高吟
雨隔疎更斷雲藏古院深
衰遲常兀兀惆悵少年心

又

心清知睡少氣定覺神凝
但有一無媿何妨百不能
燈昏如隔霧研冷欲生冰
兀爾遺身世東窗待日升

又

瘴地晨霜薄郊墟暮雨昏
啼螿如有恨微火解相溫
末路真無策孤忠敢自言
輪囷肝膽在白首倚乾坤

玉局觀拜東坡先生海外畫像

商周去不還盛哉漢唐宋蘇公本天人謫墮為世用太
平極嘉祐珠玉始包貢公車三千牘字字岌飛動
氣力倒犀象律呂諧鸞鳳天驥西極來矯矯不受
鞚飛騰上臺閣廢放落雲夢至寶不侵蝕終亦老侍
從晚途遷海表萬里天宇空豈惟騎鯨魚遂欲跨蝶
煉心空物莫撓氣老筆愈縱批糠郊祀歌遠友清廟
頌我生雖後公妙句得吟諷整衣拜遺像千古尊正

統

心太平菴

余取黃庭語
名所寓室

天下本無事庸人擾之耳
胃中故湛然忿欲定誰使本
心倘不失外物真一螳困窮
何足道持此端可死空齋
夜方中窗月淡如水忽有清
磬鳴老夫從定起

訪客至西郊

撼撼敗葉飛黯黯寒雲低
村墟與市里觸目一慘悽
今日病體輕駕言適城西
丹柿滿野店青帘出江

隄獵騎載雉兔樵擔懸鷄雞居人各自得使我念故
谿故谿不敢說况復朝金閨傷哉齧雪翁歲晚猶牧
羝下愚不自還大惑終身迷君恩何由報力耕愧黔
黎

得都下八月書報蒙恩牧敘州

鳳城書到錦江邊故里歸期愈渺然掌上山川初入
夢壺中日月尚經年方輪落落難推轂倦馬駸駸
怕著鞭未佩魚符無吏責看花且作拾遺顛

戊期
尚在

明年
冬

晚起

賣劍捐書絕世緣
掩關高枕送流年
久從道士學踵息
誰管門生嘲腹便
化蝶飛時嗟昨夢
睡蛇去後喜安眠
欠伸起看東窗日
也似金鑿過八軌

又

學道逍遙心太平
幽窗鼻息撼牀聲
柳花無蒂蠻壇煖
龜甲有紋僧帳明
候起兒童陳盥櫛
笑衰人客闔柴荆

此生睡足無餘念
安用元戎報五更

江樓吹笛飲酒大醉中作

世言九州外復有大九州
此言果不虛僅可容吾愁
許愁亦當有許酒吾酒釀盡
銀河流酌之萬斛玻瓈舟
酣宴五城十二樓天為碧羅
幕月作白玉鈎織女織慶雲
裁成五色裘披裘對酒難為
客長揖北辰相獻酬一飲
五百年一醉三千秋却駕白
鳳驂斑虬下與麻姑戲玄
洲錦江吹笛餘一念再過劔
南應小留

晚登子城

江頭作雪雪未成北風吹雲如有營驅車出門何所詣
一放吾目登高城城中繁雄十萬戶朱門甲第何崢嶸
錦機玉工不知數深夜窮巷聞吹笙國家自從失河北
煙塵漠漠暗兩京速行如鬼南至海寸地尺天皆苦兵
老吳將軍獨護蜀坐使井絡無攙槍名都壯邑數千里
至今不聞戎馬聲安危自古有倚伏相持默默非敵情
棘門灞上勿兒戲彼哉豈憚渝齊盟

夙興出謁

嗜酒狂無敵，居家嬾有餘。
苦寒愁手版，美睡付肩輿。
覓句吟哦慣，逢人省識疎。
亦知歸去好，無地著蝸廬。

十一月三日過升仙橋作

早過升仙不暇炊，橋邊買麪療朝飢。
紛紛滿座誰能識，大似新豐獨酌時。

又

熨手金鞭天馬駒，冰河雪谷笑談無。
只言燕趙多奇士。

豈必書生盡腐儒

又

橋邊沙水綠蒲老原上煙蕪黃犢閒老子真成興不淺
憑鞍歸夢遶家山

遣興

蓬壺舊隱已微茫浪迹紅塵樂未央縱酒山南十日醉
看花劍外十年狂新詩刻燭驚詞客駿馬追風戲鞠場
要是世間男子事不須臺省競飛翔

艸堂拜少陵遺像

清江抱孤村杜子昔所館
虛堂塵不掃小徑門可款
公詩豈紙上遺句處處滿
人皆欲拾取志大才苦短
計公客此時一飽得亦罕
阨窮端有自寧獨坐房瑄
至今壁間像朱綬意蕭散
長安貂蟬多死去誰復算

青羊宮小飲贈道士

青羊道士竹為家也種玄都
觀裏花微雨晴時看鶴舞
小窗幽處聽蜂衙藥鑪宿火
熒熒煖醉襲迎風獵獵斜

老我一官真漫浪會來分子淡生涯

夜寒

清夜焚香讀楚詞寒侵貂褐歎吾衰
輕冰滿研風聲急忽記山陰夜雪時

又

斗帳重茵香霧重膏粱那可共功名
三更騎報河冰合鐵馬何人從我行

書懷

武擔山上望京都誰記黃公舊酒壚宿負本宜輸左校
寬恩猶聽補東隅一官漫浪行將老萬卷縱橫只自愚
甫里松陵在何許古人投劾為尊鱸

記夢

烏巾白紵憶當年抵死尋春不自憐顛顛劍南雙鬢改
夢中猶上暗門船

又

團臍霜蠲四腮鱸樽俎芳鮮十載無塞月征塵身萬里

夢魂也復醉西湖

醉中出西門偶書

古寺閒房閉寂寥幾年耽酒負公朝
青山是處可埋骨白髮向人羞
折腰末路自悲終老蜀少年常願從征遼
醉來挾箭西郊去極目寒蕪雉兔驕

訪客不遇

風急斜吹帽泥深亂濺衣
杜門常畏罵訪客却空歸
老馬舉蹄嬾枯槐無葉飛
馳驅幾時了散髮憶苔磯

劔客行

世無知劔人太阿混凡鐵至寶棄泥沙光景終不滅一
朝斬長鯨海水赤三月隱見天地間變化豈易測國家
未雪恥臣子同此責浪迹潛山海歲晚得劔客酒酣脫
匕首白刃明霜雪夜半報讐歸斑斑腥帶血細讐何足
問大恥同憤切臣位雖卑賤臣身可屠裂誓當收北庭
再拜奏北闕逃去變姓名山中餐玉屑

故蜀別苑在成都西南十五六里梅至多有兩大

樹夭矯若龍相傳謂之梅龍予初至蜀嘗為作詩
自此歲常訪之今復賦一首丁酉十一月也

昔年曾賦西郊梅茫茫去日如飛埃即今衰病百事嬾
陳迹未忘猶一來蜀王故苑犁已遍散落尚有千雪堆
珠樓玉殿一夢破煙蕪牧笛遺民哀兩龍臥穩不飛去
鱗甲脫落生莓苔精神最遇雪月見氣力苦戰冰霜開
羈臣放士耿獨立淑姬靜女知誰媒摧傷雖多意愈厲
直與天地爭春回蒼然老氣壓桃杏笑我白髮心尚孩

微風故為作嫵媚一片吹入黃金罌

閒意

柴門雖設不曾開為怕人行損綠苔妍日漸催春意動
好風時捲市聲來學經妻問生疎字嘗酒兒斟瀲灩盃
安得小園寬半畝黃梅綠李一時栽

飲罷夜歸

老病畏多酌退閒愁夜行市燈疎欲盡樓月澹初生露
冷莎蛩咽天高塞雁征歸來差自喜擁被聽疎更

江亭冬望

霜落江清水見魚偶來徙倚草亭孤
雪天黯淡常如晚
煙樹微茫直欲無
下澤乘車終碌碌
上方請劍漫區區
擬將疎逸消豪氣
尋罷酒徒尋獵徒

大風登城

風從北來不可當
街中橫笛人馬僵
西家女兒午未粧
帳底爐紅愁下牀
東家喚客宴畫堂
兩行玉指調絲簧
錦繡四合如垣牆
微風不動金猊香
我欲登城望大荒

勇欲為國平河湟才疎志大不自量西家東家笑我狂
書雨

仲冬候始寒丙夜天正黑雨來挾風助吼擊不遺力聲
如拔高山勢若伐強國初憂老柏折遂恐石筍踣乾坤
本無心百神各効職蛟龍鬪歲算豪橫理莫測農功幸
已成龍怒亦會息屋漏何足言袖手姑默默

一笑

半醉微吟不怕寒江邊一笑覺天寬莫愁艇子急衝雨

何遜梅花頻倚闌萬事任從皮外去百年聊作夢中觀
放翁縱老狂猶在倒盡金壺燭未殘

歲晚懷鏡湖舊隱慨然有作

公府還家鬢未秋鏡湖南畔決歸休讀書精舍豈輕出
采藥名山成遠遊白墮興來猶小醉青精材足更何求
俗間毀譽惟堪笑常隘韓公咎斗牛

華髮

華髮蕭蕭老蜀關倦飛可笑不知還人生只似駒過隙

世事莫驚雷破山光景半銷樽酒裏英豪或隱博徒間
車惟閉置真何樂書劍飄然未厭閒

歎息

國家圖錄合中興歎息吾寧粥飯僧賣劍買牛衰可笑
壞裳為袴老猶能曉過射圃雲藏壘夜讀兵書雨灑燈
安得龍媒八千騎要令窮寇畏飛騰

冬至

歲月難禁節物催天涯回首意悲哀十年人向三巴老

一夜陽從九地來上馬出門愁斂版還家留客強傳杯
探春漫道江梅早盤裏酥花也鬪開

城南尋梅得

老子今年嬾賦詩風光料理鬢成絲青羊宮裏春來早
初見梅花第一枝

又

黯淡江天雪欲飛竹籬數掩傍苔磯清愁滿眼無人說
折得梅花作伴歸

又

青煙漠漠暗西村
問訊梅花置一尊
冷澹生涯元不惡

却嫌歌吹合江園

成都故事合江園官梅開
及五分即府尹領客來遊

又

籬邊細路竹間庵
一段風流擅劒南
吾國以香為佛事
客來試向鼻端參

書歎

歷盡危塗井與參鬢毛飽
受雪霜侵平生不可俗子眼

後世誰知吾輩心
河洛方行閏正朔
山林虛度醉光陰
浩歌未闕先投枕
衰病常憂感慨深

感興

少小遇喪亂
妄意憂元元
忍饑卧空山
著書十萬言
煬亮負函貸
江北煙塵昏
奏記本兵府
大事得具論
請治故臣罪
深絕衰亂根
言疎卒見棄
袂有血淚痕
爾來十五年
殘寇尚遊魂
遺民淪不收
何由雪煩冤
我髮日益白
病骸寧久存
常恐先狗馬
不見清中原

又

高帝王蜀漢天下豈易圖幡然用其鋒項羽不支梧嗟
余昔從戎久戍南鄭墟登高望夕烽咫尺咸陽都羣兇
本無政剽奪常自如民窮訴蒼天日夜思來蘇連年况
枯旱關輔尤空虛安得節制帥弓刀肅馳驅父老上牛
酒善意不可孤諸將能辦此機會無時無

暮冬夜宴

官機錦茵金蹙鳳舞娃釵墮雙鬟重寶爐三尺香吐霧

畫燭如椽風不動主人愛客情無已箏聲未斷歌聲起
亦知百歲等朝露便恐一歡成覆水爐紅酒綠春為回
坐上梅花連夜開堂前咫尺異氣候冰合平池霜壓階
枕上

枕上三更雨天涯萬里遊蟲聲憎好夢燈影伴孤愁報
國計安出復讐心未休明年起飛將更試北平秋

謁石犀廟

閒過石犀祠登堂一歎歎江回陵谷變碑斷市朝非

有王

蜀時修
廟碑銘

荒圃連寒壠
斜陽映夕霏
興亡俱昨夢
惆悵跨

驢歸

江上散步尋梅偶得

小園風月不多寬
一樹梅花開未殘
剝啄敲門嫌特地
緩拖藤杖隔離看

又

鐘殘小院欲消魂
漠漠幽香伴月痕
江上人家應勝此

明朝更出小南門

萬里橋門一
名小南門

又

小南門外野人家
短短疎籬綠白沙
紅稻不須鸚鵡啄
清霜催放兩三花

漣漪亭賞梅

判為梅花倒玉卮
故山幽夢憶疎籬
寫真妙絕橫窗影
徹骨清寒蘸水枝
苦節雪中逢漢使
高標澤畔見湘纍
詩成怯為花拈出
萬斛塵襟我自知

芳華樓賞梅

素娥竊藥不奔月化作江梅寄幽絕天工丹粉不敢施
雪洗風吹見真色出籬藏塢香細細臨水隔煙情脈脈
一春花信二十四縱有此香無此格放翁年來百事惰
唯見梅花愁欲破金壺列置春滿屋寶髻斜簪光照坐
百榼淋漓玉笋飛萬人辟易銀鞍過不惟豪橫壓清臞
聊為詩人洗寒餓

浣花賞梅

老子人間自在身插梅不惜損烏巾春回積雪層冰裏

香動荒山野水濱帶月一枝低弄影背風千片遠隨人
石家樓上貪吹笛肯放朝朝玉樹新

蜀苑賞梅

十里溫香撲馬來江頭還見去年梅喜開剩欲邀明月
愁落先教掃綠苔跌宕放翁新醉墨淒涼廢苑舊歌臺
盛衰自古無窮事莫向昆明歎劫灰

大醉梅花下走筆賦此

閉門坐歎息不飲輒千日忽然酒興生一醉須一石擔

頭花易老旗亭酒常窄出郊索一笑放浪謝形役把酒
梅花下不覺日既夕花香襲襟袂歌聲上空碧我亦落
烏巾倚樹吹玉笛人間竒事少頗謂三勅敵酒闌江月
上珠樹挂寒壁便疑從此僊朝市長掃迹醉歸亂一水
頓與異境隔終當騎梅龍海上看春色

梅龍蓋蜀苑
中故物也

之廣都憩鐵像院

歲暮天苦寒風雨復乘之道邊得古寺欣然具晨炊瘦
樹立中庭斷蔓絡短籬小僧為設爐童子燒槁枝坐令

手足柔髭間失冰
漸敬禮龕中像
盡讀無下碑
少年志
四方故里了不思
晚知行路難
更覺遊子悲
一官始已
變劍曲歸何時
置之勿復道
爛醉忘天涯

廣都江上作

微波不搖江
纖雲不行天
我來倚杖立
天水相澄鮮
平遠望不盡
日落自生煙
梅花耿獨立
雪樹明前川
好風吹我衣
春色已粲然
東村聞酒美
買醉上漁船

宿龍華山中寂然無一人
方丈前梅花盛開月下

獨觀至中夜

梅花如高人枯槁道愈尊君看
在空谷豈比倚市門我
來整冠佩潔纒三沐熏亦思
醉其下燕媿恐瀆君敬抱
綠綺琴玄酒挹古罇月明流
水間一洗世濁昏摸寫香
與影計君已厭聞老我少傑
思尚喜非陳言

次韻張季長正字梅花

倚橋臨水似催詩戲伴鵝黃
上柳絲萬里西湖驚斷夢

二年東閣憶幽期

游嘗官
唐安

挿瓶直欲連全樹簪帽憑誰

揀好枝一味淒涼君勿歎平生初不願春知

次韻季長見示

倚遍南樓十二欄長歌相屬寓悲歡空懷鐵馬橫戈意
未試冰河墮指寒成敗極知無定勢是非元自要徐觀
中原阻絕王師老那敢山林一枕安

廣都道中呈季長

天上石渠郎能來伴楚狂風霜朝竝響燈火夜連牀江
水不勝綠梅花無賴香劇談那得住出處要平章

看梅歸馬上戲作

平明南出竿橋門走馬歸來趁未昏
漸老更知閒有味
一冬強半在梅村

又

本為梅花判痛飲却嗅梅香消宿醒
日欲落時始上馬
青羊宮前聞發更

又

一點不雜桃李春
一水隔斷車馬塵
恨不來為清夜飲

月中香露濕烏巾

又

江路踈籬已過清
月中霜冷若為情
不如折向金壺貯
畫燭銀燈看到明

又

江郊車馬滿斜暉
爭趁南城未闔扉
要識梅花無盡藏
人人襟袖帶香歸

別後寄李長

俗子俗到骨一揖已溷人不知此曹面何處得許塵我
非作崖塹汝自不可親道途逢使君令我生精神頓增
江山麗更覺風月新對牀得晤語傾倒夜達晨吐起忘
縛縲小醉或墮巾繚出錦城南問訊江梅春煎茶煇野
店喚船截煙津淒涼吊廢苑蕭散誇閒身暮歸度略約
月出水鱗鱗思君去已遠此會何由頻

中夜對月小酌

今夕復何夕素月流清輝徘徊入我堂化作白玉墀栖

鳥滿高樹空庭結煙霏可憐如許景早眠人不知我幸
與周旋一醉那得辭整我接羅巾斟我翡翠卮清愁不
可耐三嗅梅花枝

客愁

騎馬出門無所詣端居正爾客愁侵蒼顏白髮入衰境
黃卷青燈空苦心天下極知須雋傑書生何恨死山林
消磨未盡胸中事梁甫時時尚一吟

詩酒

酒隱凌晨醉詩狂徹旦歌憫憐蝸左角嘲笑螳南柯風
月隨長笛江湖入短蓑平生會心處最向漆園多

道室夜意

寒泉漱酒醒午夜誦仙經茶鼎聲號蚓香盤火度螢三
心守玄牝閉目得黃寧寄語山中友因人送茯苓

道室晨起

紙帳晨光透山爐宿火燃雞鳴猶喔喔鴉起已翩翩形
槁寒巖木心凝古澗泉何須更臨鏡斷是一癯仙

城南王氏莊尋梅

涸池積槁葉，茆屋圍疎籬。
可憐庭中梅，開盡無人知。
寂寞終自香，孤貞見幽姿。
雪點滿綠苔，零落尚爾奇。
我來不須晴，微雨正相宜。
臨風兩愁絕，日暮倚筇枝。

遊萬里橋南劉氏小園

佳園寂無人，滿地梅花香。
閒來曳拄杖，臘月日已長。
朱橋架江面，欄影搖波光。
奇哉小垂虹，夢破鱸魚鄉。
汀鷺一點白，煙柳千絲黃。
便欲喚釣舟，散髮歌滄浪。
可憐隔

岸人車馬日夜忙我歸門復掩寂歷挂斜陽

過笮橋道中龍祠小留

江邊龍廟何年作白浪花中插朱閣朝暾漸上宿霧收
春氣已動晨霜薄我來倚欄一悵然蘆花滿空如柳綿
安得身為雙白鷺飛上灘頭却飛去

道上見梅花

載酒房湖風日美探梅喜折一枝新今朝忽向街頭見
萬萼千跗俗却春

倚樓

減盡朱顏白髮新高樓徙倚默傷神未酬馬上功名願
已是人間老大身太史周南方臥疾拾遺劍外又逢春
一杯且為江山醉百萬呼盧迹已陳

寄王季夷

平生吾子最知心巴隴飄零歲月侵萬里喜聞身尚健
五更惟有夢相尋插花意氣狂如昨中酒情懷病至今
共約暮年須強飯天台廬阜要登臨

丁酉除夕

浮生過五十光景如飛鴻寒暑俛仰間四序忽已終殊
方感飄泊晚境嗟龍鍾桃符與爆竹嬾復隨兒童不寐
非守歲燕坐夜過中氣定神自凝海日何瞳矐豈惟三
彭逃坐覺六入空徂年勿惆悵閱世方無窮

正月二日晨出大東門是日府公宴移忠院

成都春事早開歲已暄妍熅尾傳盃後遨頭出郭前爭
門金駟裹滿野繡輜輶白髮花邊醉何妨似少年

小飲落梅下戲作送梅

零落梅花不自由，斷腸容易付東流。
與人又作經年別，問月應知此夜愁。
已是狂風卷平野，更禁橫笛起危樓。
何時小雪山陰路，處處尋香繫釣舟。

立春

鬢毛蕭颯寸心灰，生怕新年節物催。
幸是身閒朝睡美，忽聞鼓吹打春回。

初春出遊戲作

綠窗百舌喚春眠，問柳尋花意已便。
京洛化衣無夢去，邯鄲觀伎有詩傳。
銅壺閣下閒歌帽，石鏡坊前戲墜鞭。
酒隱人間君勿謂，定勝山澤作臞仙。

初春遣興

始於志退休而終於惓惓許國之忠亦臣子大義也

爛熟思來怕執官，退飛心地喜輕安。
捨魚正可取熊掌，食肉何須知馬肝。
放眼柳梢初暗動，褪花梅子已微酸。
典衣剩作江頭醉，莫謂天涯苦鮮歡。

又

大隱悠悠未棄官俸錢雖薄却心安人方得意矜蝸角
天豈使予為鼠肝佳日劇棋忘旅恨短衣馳射壓儒酸
小桃楊柳爭時節載酒江頭罄一歡

又

白髮淒涼故史官十年身不到長安即今天末吊形影
何日上前傾肺肝孤憤書成詞激烈五噫歌罷意辛酸
此懷欲說無人共安得相攜素所歡

予年十六始識葉晦叔於西湖上後二十七年晦

叔之弟聲叔來為臨邛守相遇於成都悔叔沒久
矣訪其遺文畧無在者乃賦此詩

故人零落久山丘誰記京華第一流曹霸揮毫空萬馬
庖丁投刃解千牛相逢夢境何勞記追想清言未免愁
雷電取將遺稿盡他年虛有茂陵求

初春探花有作

燈山昨夢歎怱怱便恐新春過眼空千縷未搖官柳綠
一梢初放海棠紅金羈絡馬閒遊處彩筆題詩半醉中

流落天涯何足道年年常策探花功

遊諸葛武侯書臺

沔陽道中草離離臥龍往矣空遺祠當時典午稱猾賊
氣喪不敢當王師定軍山前寒食路至今人祠丞相墓
松風想像梁甫吟尚憶幡然奮三顧出師一表千載無
遠比管樂蓋有餘世上俗儒寧辨此高堂當日讀何書

觀花

我遊西川醉千場萬花成圍柳著行紅錦地衣舞霓裳

翠帟繡袂天寶粧清歌一發無留觴
娟娟餘聲縈杏梁
黃金絡馬照路光自護幕離觀
海棠搜竒選勝日夜忙
不惟燕宮碧雞坊暮歸奚奴負錦囊
路人爭看放翁狂

張園觀海棠

朝陽照城樓春容極明媚走馬蜀錦園
名花動人意嚴粧漢宮曉一笑初破睡
定知夜宴歡酒入妖骨醉低鬟羞不語
困眼嬌欲閉雖豔無俗姿太息真富貴
結束吾方歸此別知幾歲黃昏廉纖雨
千點衰紅淚

月夕

醉從東郭歸散髮臨前楹呼僮淨埽地勿使黠月明庭
空臥松影蒼簷迥送鐸聲鐘斷心境寂露下毛髮清出門
碧霧合九陌無人行坐令錦官城化作白玉京

夜飲即事

天涯久客我何堪聊喜燈前得縱談磊落金盤薦糖蟹
纖柔玉指破霜柑燭圍寶馬人將起花墜紗巾酒正酣
更作茶甌清絕夢小窗橫幅畫江南

夜宴賞海棠醉書

便便癡腹本來寬不是天涯強作歡燕子歸來新社雨
海棠開後却春寒醉誇落紙詩千首歌費纏頭錦百端
深院不聞傳夜漏忽驚蠟淚已堆盤

二月十六日賞海棠

常年春半花事竟今年春半花始盛衰翁不減少年狂
走馬直與飛蝶競妍華有露洗愈明纖弱無風搖不定
莫放飄零作紅雨剩看倩笑臨粧鏡溪梅枯槁墮巖

谷山杏輕浮真妾媵欲誇絕艷不勝說縱欠濃香何足
病華燈銀燭搖花光翠杓金船豪酒興夜闌感事獨淒
然繁枝空折誰堪贈

即席

解鞅名園眼倍明殷勤翠袖勸飛觥海棠紅杏欲無色
蛺蝶黃鸝俱有情去日不留春漸老歸舟已具客將行
倦遊短鬢無多綠生怕尊前唱渭城

東歸有日書懷

萬里橋邊白版扉三年高臥謝塵鞿半窗竹影碁僧去
滿棹蘋風釣伴歸看鏡已添新雪鬢聽雞重拂舊朝衣
故人零落今無幾華表空悲老令威

眉州披風榭拜東坡先生遺像

蜿蜒回顧山有情平鋪十里江無聲孕奇蓄秀當此
地鬱然千載詩書城高臺老仙誰所寫仰視眉宇寒崢
嶸百年醉魂吹不醒飄飄風袖筇枝橫爾來逢迎厭俗
子龍章鳳姿我眼明北扉南海均夢耳謫墮本自白玉

京惜哉畫史未造極不作散髮騎長鯨故鄉歸來要有
日安得春江變酒從公傾

劍南詩豪卷九

欽定四庫全書薈要卷一萬五千五百

集部

劔南詩豪卷十

宋 陸游 撰

訪青神尉解借景亭蓋山谷先生舊遊也

造朝下白帝弔古遊青神城頭三間屋聊得岸我巾元
祐太史公世寧有斯人瘴煙侵玉骨老作宜州民至今
杖屨地來者猶酸辛密竹翦已空喬木亦半薪陂池獨
渺然中有鷗鷺馴人生能自足一尉可終身三歎下城

去換拖春江津

舟過玉津

玻瓈江上送殘春，疊鼓催颿過玉津。
蜀苑鶯花初破夢，巴山風月又關身。
幅巾久已忘朝幘，短劔惟思隱市塵。
莫倚諸公容此老，西曹邴許吐車茵。

敘州

畫船衝雨入戎州，縹渺山橫杜若洲。
須信時平邊堠靜，

傳烽夜夜到西樓

州治西樓

又

文章何臯觸雷霆風雨南谿自醉醒八十年間遺老盡

壞堂無壁草青青

無等院山谷故居

又

楚施吳檣又遠遊浣花行樂夢西州千尋鐵鎖還堪恨

空鎖長江不鎖愁

鎖江亭

瀘州使君巖在城南一里深三丈有泉出其左音

中律呂木龍巖相距亦里許黃太史所嘗遊憩也

雲間刁斗過邊州沙際丘亭艤客舟漲水方憂二峽嶮
短筇猶作雨巖遊蛟龍矯矯拏雲起琴筑泠泠繞榻流
未死人生誰料得會來攜客試茶甌

南定樓遇急雨

行遍梁州到益州今年又作度瀘遊江山重複爭供眼
風雨縱橫亂入樓人語未離逢峒獠棹歌欸乃下吳舟
天涯住穩歸心嬾登覽茫然却欲愁

夜泊合江縣月中小舟謁西涼王祠

懸瀑雪飛舞竒峯玉嶙峋搖碎一江月來謁西涼神我
雖不識神知是山水人不敢持笏來袒褐整幅巾出我
囊中香羞我南谿蘋杯湛玻瓈春盤橫水精鱗出門意
恂恂煙波浩無津安得結茆地與神永為隣

風順舟行甚疾戲書

昔者遠戍南山邊軍中無事酒如川呼盧喝雉連算夜
擊兔伐狐窮歲年壯士春燕臥白骨老夫晨鏡悲華顛
可憐使氣尚未減打鼓順流千斛船

舟中對月

百壺載酒遊凌雲醉中揮袖別故人依依向我不忍別
誰似峨眉半輪月月窺船窗挂淒冷欲到渝州酒初醒
江空裊裊釣絲風人靜翩翩葛中影哦詩不睡月滿船
清寒入骨我欲仙人間更漏不到處時有沙禽背船去

漁翁

江頭漁家結茆廬青山當門畫不如江煙淡淡雨疎疎
老翁破浪行捕魚恨渠生來不讀書江山如此一句無

我亦衰遲慙筆力共對江山三歎息

涪州道中

遠客喜歸路清遊逾昔聞雨添山翠重舟壓浪花分洛

叟經名世張侯勇冠軍

郡境有伊川先生故居及張翼德祠

懷人不可覩

袖手對爐熏

涪州

古壘西偏曉繫舟倚欄搔首思悠悠欲營丹竈竟無地
地產丹砂不見荔枝空遠遊官道近江多亂石人家避水半

危樓使君不用勤留客瘴雨蠻雲我欲愁

太守招飲
辭不往

北巖

有程正叔
先生祠堂

艤船涪州岸攜兒北巖遊搖楫橫大江褰裳躡高樓雨
昏山半失江漲地欲浮老矣寧再來為作竟日留烏帽
程丈人閉戶本好修駭機一朝發議罪至竄投黨禁久
不解風塵暗神州修怨以稔禍哀哉誰始謀小人無遠
畧所懷在私讎後來其鑑茲賦詩識巖幽

平都山

忠州豐
都縣

名山近江步蠟屐得閒行
犇鹿衝人過藏丹徹夜明
唐碑多斷蝕梁殿半欹傾
洞口雲常湧簷牙柏再榮
行逢負籠客臥聽送船聲
乞我誅茆地靈苗得共烹

忠州禹廟

古郡已蠻國空山夏禹祠
鴉歸暗庭栢巫拜薦江籬
草蔓青緣壁苔痕紫滿碑
欲歸頻悵望回棹夕陽時

忠州醉歸舟中作

耿耿船窗燈火明
東樓飲罷恰三更
不堪酒渴兼消渴

起聽江聲雜雨聲垂首道塗悲驥老滿懷風露覺蟬清
蘭亭禹廟山如畫安得飄然送此生

雨中遊東坡

木蓮花下竹枝歌歡意無多感慨多更恐他年有遺恨
曉來衝雨上東坡

龍興寺吊少陵先生寓居

中原草草失承平戍火胡塵到兩京扈蹕老臣身萬里

天寒來此聽江聲

以少陵詩考之蓋以秋冬間寓此州也寺門聞江聲甚壯

遊萬州岑公洞

岑公隋時人居此
二十年得道仙去

大業征遼發閭左軍興書檄煎膏火此時也復有閒人
自引巖泉拾山果後六百歲吾來遊洞中正夏淒如秋
乳石床平可坐臥水作珠簾月作鈎十年神遊八極表
浮名坐覺秋豪小試問岑公迎我不鶴飛忽下青松杪

萬州放船過下巖小留

畫船四月滿旗風飲散匆匆鷓首東醉裏偏憐江水綠
意中已想荔枝紅斷碑零落莓苔遍幽澗淙潺畧約通

一足寧無好東絹憑誰畫此碧玲瓏

白帝泊舟

客路間無事津亭爽有餘峽江春漲減灤岸夜燈疎老
矣孤舟裏依然十載初倦遊思稅駕更覺愛吾廬

醉中下瞿唐峽中流觀石壁飛泉

吾舟十丈如青蛟乘風翔舞從天下江流觸地白鹽動
灩澦浮波真一馬主人滿酌白玉盃旗下畫鼓如春雷
回頭已失灤西市奇哉一削千仞之蒼崖蒼崖中裂銀

河飛空裏萬斛傾珠璣醉面正須迎亂點京塵未許化
征衣

算次秭歸

朝披南陵雲夕揖建平樹啼鴉隨客檣落日滿孤戍惡
灘不可說石芒森如鋸浪花一丈白吹沫入窗戶是身
初非我底處著憂怖酒酣一枕睡過盡鮫鱗怒欣然推
枕起曳杖散予步殷勤沙際柳記我維舟處

歸州重五

鬪舸紅旗滿急湍船窗睡起亦閒看屈平鄉國逢重五

不比常年角黍盤

屈平祠在州東南五里歸鄉沱蓋平居也

屈平廟

委命仇讎事可知章華荆棘國人悲恨公無壽如金石
不見秦嬰係頸時

楚城

江上荒城猿鳥悲隔江便是屈原祠一千五百年間事
只有灘聲似舊時

新灘舟中作

三峽新灘尤
險今已平矣

江路桃花浪已生
新灘穩過失崢嶸
九年行半九州地
三峽歸無三日程
繫纜便增筇杖興
倚窗時聽棹歌聲
衰遲未覺詩情減
又礙吳牋賦楚城

舟出下牢關

大舸凌驚濤飛度青玉峽
虛壁雲濛濛陰洞風颯颯
拂天松蓋偃入水山脚插
炎曦忽推破亭午手忘筆
懸知今夜喜月白宿沙夾
曠哉七澤遊盟鷗不須軟

峽口夜坐

三峽至此窮雨壁猶峭立估船無時行婦盍有夜汲風
生樹影動月碎水流急草根綴微露螢火飛熠熠吾行
已四旬纔抵楚西邑浩歌散鬱陶還舟覺衣濕

峽州甘泉寺

江上甘泉寺登臨擅一州山亭喜無恙老子得重遊灘
急常疑雨林深欲借秋歸途更清絕倚杖喚漁舟

峽州東山

十年不踏東山路今日重為放浪行老矣判無黃鵠舉
歸哉惟有白鷗盟新秧刺水農家樂修竹環溪各眼明
已駕巾車仍小駐綠蘿亭下聽鶯聲

江上觀月

暗浪衝舟鞢鞞聲夷陵城下正三更十分傾酒禁風力
一點無雲崇月明久坐不知衣露濕浩歌時有水禽驚
詩成莫駕長鯨去自是虛皇白玉京

初發夷陵

雷動江邊鼓吹雄，百灘過盡失途窮。
山平水遠蒼茫外，地闊天開指顧中。
俊鶻橫飛遙掠岸，大魚騰出欲凌空。
今朝喜處君知否，三丈黃旗舞便風。

舟中夜坐

風露浩無際，星河淡欲傾。
遙知竝船客，聞我詠詩聲。
水鳥橫江去，漁舟背月行。
神清不成寐，隱几待窗明。

初到荊州

萬里泛仙槎，歸來鬢未華。
蕭蕭沙市雨，淡淡渚宮花。
斷

岸添新漲高城咽晚笳
船窗一樽酒半醉落鳥紗

醉歸

持酒江頭到夕霏
愁城頓覺解重圍
澄波宜月移船看
醉面便風走馬歸
末路已驚添白髮
故人頻報上黃扉
彊隨官簿真成嬾
乞我吳松舊釣磯

出遊

萬里崎嶇蜀道歸
荆州非復壯遊時
行吟自怪詩情減
坐睡人驚酒量衰
卷地風號雲夢澤
黏天草映伏波祠

一枝藤杖平生事擊鼓開帆未恨遲

大堤

日晚大堤行莽然千里平天低垂曠野風壯撼高城列
肆居茶估連營宿戍兵纍纍北門堠淚盡望神京

荊州
距東

都纒十
七八程

阻風

沙市三日風萬鼓鳴船頭欲去不得發臥對青燈幽聽
兒誦離騷可以散我愁微言入孤夢恍與屈宋遊睡起

銅瓶響欣然喚茶甌吾道無淹速風伯非所尤

初發荊州

淋漓牛酒起檣干健艣飛如插羽翰破浪乘風千里
快開頭擊鼓萬人看鵲聲不斷朝陽出旗脚微舒宿雨
乾堪笑塵埃洛陽客素衣如墨據征鞍

泊公安縣

秦關蜀道何遼哉公安渡頭今始回無窮江水與天接
不斷海風吹月來船窗簾捲螢火鬧沙渚露下蘋花開

少年許國忽衰老心折柁樓長

一作

笛哀

劉郎浦夜賦

平生遠遊心眈眈萬里窄今年下三巴放浪浮七澤菰
蒲無遠近但覺風索索浪高星辰濕天碧河漢白十年
散醉髮未易著朝憤守符倘可乞來作瀟湘客

小雨極涼舟中熟睡至夕

舟中一雨掃飛蠅半脫綸巾臥翠藤清夢初回窗日晚
數聲柔艣下巴陵

岳陽樓

身如病鶴短翅翎
雨雪飄灑號沙汀
天風忽吹不得住
東下巴峽泛洞庭
軒皇張樂雖已矣
此地至今朝百靈
雄樓岌業鎮吳楚
我來舉手捫天星
帆檣纒放已隱隱
雲氣亂入何冥冥
鼉鼉出沒蛟鰐橫
浪花遮盡君山青
黃衫仙翁喜無恙
袖劍近到城南亭
眼前俗子敗人意
安得與翁同醉醒

再賦一絕

江風吹雨濯征塵百尺闌干爽氣新不向岳陽樓上醉
定知未可作詩人

蔡大風發巴陵

雪濺浪方作翠颭山欲浮奇哉萬頃湖著我十丈舟三
老請避風叱去非汝憂神物識忠信壯士憎滯留擊鼓
催挂帆揮手別岳州仰視群鵠翔下闔百怪囚衡湘清
絕地恨不從此遊聊須百斛酒往醉庾公樓

通濟口

朝發嘉魚縣晚泊通濟口
睡起喜微涼船窗一盃酒
長魚吹浪聲恐人巨龜露背浮
齋淪今夕風生月復暗寄
語舟人更添纜

醉書

青草渡頭波接天山翁吟嘯自悠然
朝餐偶過賣魚市晚泊時逢迎荻船
投老未除遊俠氣平生不作俗人緣
一樽酌罷玻璃酒高枕窗邊聽雨眠

偶餘眉州酒一樽獨酌遂醉

南樓

十年不把武昌酒，此日闌邊感慨深。
舟楫紛紛南復北，山川莽莽古猶今。
登臨壯士興懷地，忠義孤臣許國心。
倚杖黯然斜照晚，秦吳萬里入長吟。

黃鶴樓

手把仙人綠玉枝，吾行忽及早秋期。
蒼龍闕角歸何晚，黃鶴樓中醉不知。
江漢交流波渺渺，晉唐遺迹草離離。
平生最喜聽長笛，裂石穿雲何處吹。

頭陀寺觀王簡栖碑有感

舟車如織喜身閒，獨訪遺碑草棘間。
世遠空驚閱陵谷，文浮未可敵江山。
老僧西逝新成塋，舊守東歸正掩關。
笑我驅馳竟安往，夕陽飛鳥亦知還。

庚寅過武昌與太守張之彥遊崇日

時頭陀有老僧持律精苦

夜熱

觸熱行萬里，煩促誰可論。
泊船鄂州步，終日如炮燔。
搖扇腕欲脫，揮汗白雨翻。
推枕再三起，散髮臨前軒。
秋近更漏長，天旱星宿繁。
甘澍何時來，太息憂元元。

鄂州頗閏雨

舟中偶書

老子西遊萬里回江行長夏亦佳哉
晝眠初起報茶熟
宿酒半醒聞雨來漢口船開催疊鼓
淮南帆落亞高桅
四方本是丈夫事白首自憐心未灰

燈下讀書

少年喜書象白首意未足幽窗燈一點
樂處超五欲而况黃州路
小雨漁村宿蕭蕭蒹葭聲為我洗暑毒
琅然誦經史少倦兒為續何必效萊公
長夜醉畫燭

泊三江口

遲明離武昌薄暮次黃岡勿言觸熱行一雨三日涼北
窗秋蕭蕭南窗江茫茫玄雲一池墨碧綫半篆香尚無
車馬塵况復爭奪場徐行勿挂帆此樂殊未央

自雪堂登四望亭因歷訪蘇公遺迹至安國院

我醉飛屐登孱顏拄杖出沒風煙間三山葱蘢鮫鱗靜
九關肅穆虎豹閒幾年金骨煉綠髓此日始得窮躋攀
老僊歸侍紫皇案空有野水流淙潺蜿蜒翠阜圍綠野

似嶺非嶺山非山向來龍蛇滿雪壁雷電下取何時還

名花亦已天上去居人指似題詩處九十一翁不識公

我抱此恨知無窮

定惠院已廢海棠亦不復在安國老僧景滋年九十一自言東坡去黃後

四年
方生

月下步至臨臯亭

芒屨踏松陰迨此船未發清遊豈無伴三友風露月山
川鬱盤紆鷗鷺浩滅沒當年老先生想像散醉髮浮生
等昨夢久已埋玉骨吾儕幸彊健何事拘簪笏

發黃州泊巴河遊馬祈寺

南望武昌山北望齊安城楚江萬頃綠著我畫舫橫雲
帆不須挂鼉鼓不須鳴淡然隱曲几山水相逢迎疎雨
漏薄日非陰亦非晴晚泊巴河市小陌聞屐聲紫髯刑
馬地一怒江漢清中原今何如感我白髮生

舟行蘄黃間雨霽得便風有感

天青雲白十分晴帆飽舟輕盡日行江底魚龍貪晝睡
淮南草木借秋聲好山縹緲何由住華髮蕭條只自驚

莫怪時人笑疎嬾官情元不似詩情

南京

十年流落憶南京初見鱸魚眼自明堪笑吾宗輕許可
坐令羊酪僭尊羹

泊蘄口泛月湖中

炎天倦長路月夕泛平湖晃漾披銀闕清寒住玉壺釣
絲縈藻行蓬艇入菰浦自別蜻蜓浦斯遊十載無

予故廬在

蜻蜓港東南暑月嘗
與客泛舟至中夜

初見廬山

從軍憶在梁州日，心擬西征草捷書。
鐵馬但思經太華，布帆何意拂匡廬。
計謀落落知誰許，功業悠悠定已疎。
尚喜東林尋舊社，月明清露濕芙蕖。

六月十四日宿東林寺

看盡江湖千萬峯，不嫌雲夢芥吾胸。
戲招西塞山前月，來聽東林寺裏鐘。
遠客豈知今再到，老僧能記昔相逢。
虛窗熟睡誰驚覺，野碓無人夜自舂。

舟過小孤有感

小孤山畔峭帆風，又見煙鬟縹緲中。
萬里客經三峽路，千篇詩費十年功。
未嘗滿箸蒲芽白，先看堆盤鱸縷紅。
商畧人生為何事，一蓑從此入空濛。

雁翅夾口小酌

墟煙淡將散，江雨細欲無。
回風吹衣襟，晴光滿菰蒲。
隱几樂此時，清和如夏初。
犬吠船丁歸，小市得美蔬。
歡言酌清醪，侑以案上書。
雖云泊江渚，何異歸林廬。

長風沙

江水六月無津涯
驚濤駭浪高吹花
艣聲已出雁翅浦
荻夾喜入長風沙
長風自古三巴路
檣竿參差雜煙樹
南船北船各萬里
淒涼小市相依住
歌呼雜沓燈火明
黃昏風死浪亦平
勞苦舟師剩沽酒
安穩明朝到池口

泛小舟姑孰溪口

姑溪綠可染小艇
追晚涼棹進破樹
影波動搖星芒荻
深漁火明風遠水
草香尚想錦袍公
醉眼隘八荒坡陀

青山冢斷碣臥道旁悵望不可逢乘雲遊帝鄉

溪東南
即青山

太白

墓

明日再遊又賦

舟中如甌炊端坐畏暘死未能踏層冰且復呼艇子
纖新月低玉鈎沈野水微風生蘋末塵抱真一洗可憐
黃山墮突兀算煙裏依然十年前看我行萬里雨漿且
勿搖橫舟小灘尾得詩偶長吟宿鷺為驚起

過采石有感

短衣射虎早霜天歎息南山又七年唾手每思雙羽箭
快心初見萬樓船平波漫漫看浮馬一作深鳥高柳陰陰聽
亂蟬明日重尋石頭路醉鞍誰與共聯翩

將至金陵先寄獻劉留守

梁益羈遊道阻長見公便覺意差彊別都王氣半空紫
大將牙旗三丈黃江面水軍飛海鷗帳前羽箭射天狼
歸來要了浯溪頌莫笑狂生老更狂

登賞心亭

蜀棧秦關歲月邁今年乘興却東遊
全家穩下黃牛峽
半醉來尋白鷺洲黯黯江雲瓜步雨
蕭蕭木葉石城秋
孤臣老抱憂時意欲請遷都涕已流

夜泊龍廟回望建康有感

我醉行水上身輕如飛煙魚龍互悲嘯
伴我夜不眠羽扇揮浮雲月挂牛斗間
河漢橫復斜風露方浩然坡陀石頭城
寂莫七百年世事感予懷竦身入青天

將至京口

臥聽金山古寺鐘三巴昨夢已成空
船頭坎坎回帆鼓
旗尾舒舒下水風
城角危樓晴靄碧
林間雙堦夕陽紅
銅瓶愁汲中濡水
不見茶山九十翁

頃在京口嘗取中
濡水寄曾文清公

荆谿館夜坐

河漢無聲天正青
三三五五滿天星
草根冷露黏濕螢
幽人岸巾坐津亭
憶下瞿唐浮洞庭
陽臺繫船夢娉婷
朱門重重夜不扃
四山猿鳥啼青冥
人生無蒂風中萍
幸我夢斷狂已醒
繡鞵金絡帶萬釘
何如故山鋤茯苓

沂谿

射的峯前禹廟東
短蓬三扇臥衰翁
閒攜清聖濁賢酒
重試朝南算北風
水落痕留紅蓼節
雨來聲滿綠蒲叢
衝煙莫作匆匆去
擬看溪丁下釣筒

歸雲門

萬里歸來值歲豐
解裝鄉野樂無窮
甌炊飽雨湖菱紫
篋絡迎霜野柿紅
壞壁塵埃尋醉墨
孤燈餅餌對隣翁
微官行矣闕山去
又寄千巖夢想中

月下自三橋泛湖歸三山

素壁初升禹廟東，天風為我送孤蓬。
山橫玉海蒼茫外，人在冰壺縹緲中。
茅舍燈青聞吠犬，蘋汀煙淡見驚鴻。
白頭尚耐清寒在，安得終年伴釣翁。

懷成都十韻

放翁五十猶豪縱，錦城一覺繁華夢。
竹葉春醪碧玉壺，桃花駿馬青絲鞵。
鬪雞南市各分朋，射雉西郊常命中。
壯士臂立綠條鷹，佳人袍畫金泥鳳。
椽燭那知夜漏殘。

銀貂不管晨霜重一梢紅破海棠回數藥香新早梅動
酒徒詩社朝算忙日月匆匆送賓送浮世堪驚老已成
虛名自笑今何用歸來山舍萬事空臥聽槽牀酒鳴瓮
北窗風雨耿青燈舊遊欲說無人共

湖村秋曉

劔閣秦山不計年却尋剡曲故依然盡收事業漁舟裏
全付光陰酒榼邊平野曉聞孤唳鶴澄湖秋浸四垂天
九關虎豹君休問已向人間得地仙

夜夢與宇文子友譚德稱會山寺若餞予行者明
日犁明得子友書感歎久之乃作此詩

夜夢集山寺二三佳友生相顧慘不樂若有千里行在
門僕整駕臨道騅嘶鳴我友顧謂我天寒戒晨征遲速
要當到徐驅勿貪程叮寧及藥餌依依有餘情隣鐘忽
驚覺鴉翻窗欲明作詩謝我友有使頻寄聲

寒夜

小隱謝城市新寒尋褐袍秋燈依壁暗夜雨挾風豪俗

自隨時異身寧與世塵殘年更何事持蟹酌松醪

偷閒

老向人間未拂衣偷閒聊喜息塵機丹楓斷岸秋來早
淡日孤村客到稀偶憶雪溪攜鶴去却從雲肆買蓑歸
酒徒莫笑生涯別久矣淵明悟昨非

冬夜聞雁有感

從軍昔戍南山邊傳烽直照東駱谷軍中罷戰壯士閒
細草平郊恣馳逐洮州駿馬金絡頭梁州毬場日打球

玉杯傳酒和鹿血女真雜坐彈箏篴大呼拔幟思野戰
殺氣當年赤浮面南遊蜀道已低摧猶據胡牀飛百箭
豈知蹭蹬還江邊病臂不復能開弦夜聞雁聲起太息
來時應過桑乾磧

書懷

愁向東華蹋軟紅暫歸舊隱樂無窮石池洗藥涓涓水
漁艇投竿嫋嫋風盡日醉醒菱唱裏隣家來往竹陰中
何須列戟長安第四面雲山擁此翁

湖中葺歸

弄檝漁舟水濺衣興闌却傍柳邊歸風平別浦沈新月
日落前村鎖夕霏乍起鷺行橫野去欲栖鴉陣暗天飛
詩情自合江湖老敢恨功名與願違

題齋壁

葺得湖邊屋數椽茅齋低小竹窗妍墟煙寂歷歸村路
山色蒼寒釀雪天性懶杯盤常偶爾地偏雞犬亦翛然
早知栗里多幽事虛走人間四十年

新葺門屋

林棲四壁空百事從簡易缺籬寒未補幽戶夜不閉東
偏欲廣屋厚費敢輕議設闕力可具稚子請遂事呀然
兩竹扉寧復志容駟西山正當前浩蕩納空翠下臨漁
樵路橫鎖風月地惟愁俗客來剝啄驚午睡

吾廬

吾廬雖小亦佳哉新作柴門斲綠苔拄杖每聞歸鶴入
釣船時帶夕陽來墟煙隔水霏霏合離菊凌霜續續開

千里安期那可得笑呼鄰父共傳杯

冬夜泛舟有懷山南戎幕

釣船東去掠新塘船近蓬低露弱香十里澄波明白石
五更殘月伴清霜飄飄楓葉無時下嫋嫋菱歌盡意長
誰信梁州當日事鐵衣寒枕綠沉槍

夢至成都悵然有作

春風小陌錦城西翠箔珠簾各意迷下盡牙籌閒縱博
刻殘畫燭戲分題紫氍毹暖帳中醉紅叱撥驕花外嘶

孤夢淒涼身萬里令人憎殺五更雞

又

宦途元不羨飛騰錦里豪華壓五陵紅袖引行遊玉局
華燈圍坐醉金繩階前汗血洮河馬架上霜毛海國鷹
世事轉頭誰料得一官南去冷如冰

月夕

開戶滿庭雪徐看知月明微風入叢竹復作雪來聲俗
塵不待掃凜然肝肺清村深無漏鼓鶴唳報三更

將入閩夜行之雲門

東鷺竝偏門
籃輿兀睡昏
紡燈穿壁罅
吠犬闖籬根
久客悲行役
清愁怯夢魂
餘生猶幾出
回首付乾坤

山中觀殘菊追懷眉山師伯渾

空山菊花瘦
如棘傾倒滿
地枝三尺陰
風冷雨不相貸
爛草蒼苔共
狼藉人雖委棄
渠自香詎必泛
酒登華堂
君不見仁人志
士窮死眉山陽
空使後世傳文章

自雲門之陶山肩輿者失道行亂山中有茅舍小

塘極幽邃求見主人不可意其隱者也

陂池幽處有茅堂井臼蕭條草樹荒小鴨怯波時聚散
病蔬傷蠹半青黃童兒衝雨收魚網婢子聞鐘上佛香
我亦算年思屏迹數椽何計得連牆

冬夜聽雨戲作

少年交友盡豪英妙理時時得細評老去同參惟夜雨
焚香臥聽畫簷聲

又

遠簷點滴如琴筑支枕幽齋聽始竒憶在錦城歌吹海
七年夜雨不曾知

適閩

春殘猶看少城花雪裏來嘗北苑茶未恨光陰疾駒隙
但驚世界等河沙功名塞外心空壯詩酒樽前髮已華
官柳弄黃梅放白不堪倦馬又天涯

欲行雨未止

幽幔依燈影空階送雨聲斲歸仍客路投老倍鄉情眼

澀書難讀心搖夢易驚
病多常怕醉酒盡却思傾

比作陳下瓜麴釀成奇絕
屬病場不敢取醉小啜而已

翠蔓扶疎采擷忙
麴生系出古淮陽
蹋成明月團團白
釀作新鵝淡淡黃
醅甕秋淒驚凜冽
糟牀夜注愛淋浪

西齋幽事新成譜
首為高人著此方

酒方昔得之胡基仲

大雨中離三山宿天章寺

苦雨催寒不肯晴
晚來餘勢更縱橫
雲如山壞長空黑

風似潮回萬木傾，要借關河供遠眼。
不辭泥淖困初程，解衣一笑僧窗下。
幾兩青鞵了此生。

早飯于溪蓋于吉故居也

劍外歸來席未溫，南征浩蕩信乾坤。
峯回內史曾遊地，竹暗仙人舊隱村。
白髮孤翁鉏麥壠，茜裙小婦闔離門。
行行莫動鄉關念，身似流槎豈有根。

贈楓橋化城院老僧

老宿禪房裏，深居罷送迎。
爐紅豆其火，糝白芋魁羹。
毳毳

初年年補紗燈夜夜明
門前霜半寸笑我事晨征

雙橋道中寒甚

裂面霜風快似鎌
重重裘袴晚仍添
梅當官道香撩客
山逼籃輿翠入簾
男子坐為衣食役
年光常向道途淹
古來共說還家樂
宜獨全軀畏楚鉗

行牌頭奴寨之間皆建炎未避賊所經也

今朝霜薄風氣和
霽色滿野行人多
沙平水淺木葉下
搖櫂渡口生微波
建炎避兵奔竄地
誰料白首重經過

四十餘年萬事改惟有青嶂高嵯峨安得西國蒲萄酒
滿酌南海鸚鵡螺侑以吳松長絲之玉鱠送以邯鄲皓
齒之清歌向來喪亂汝所記大地凜凜憂干戈偶然不
死到老大為底苦惜朱顏酡

早發奴寨

暖徹衣篝蠟炬明鄰雞喔喔促殘更丈夫雖有四方志
客子終悲千里行月落龍蛇蟠木影山空風雨起難聲
上車莫恨晨霜冷又得修途一日晴

題繡川驛

繡川池閣記曾遊落日欄邊特地愁
白首即今行萬里
淡煙依舊送孤舟
歸心久負鱸魚膾
春色初回杜若洲
會買一蓑來釣雨
憑誰先為謝沙鷗

夜行宿湖頭寺

臥載籃輿黃葉村
疎鐘杳杳隔谿聞
清霜十里伴微月
斷雁半行穿亂雲
去國不堪心破碎
平戎空有膽輪困
泗濱樂石應如舊
誰勒中原第一勲

衢州道中作

耿耿孤忠不自勝
南來清夢遶觚稜
驛門上馬千峯雪
寺壁題詩一硯冰
疾病時時須藥物
衰遲處處少交朋
無情最恨寒沙雁
不為愁人說杜陵

過靈石三峯

奇峯迎馬駭衰翁
蜀嶺吳山一洗空
拔地青蒼五千仞
勞渠蟠屈小詩中

又

曉日曛曛雪未殘三峯傑立插雲間老夫合是征西將
胷次先收一華山

宿僊霞嶺下

吾生真是一枯蓬行徧人間路未窮暫聽朝雞雙闕下
又騎羸馬萬山中重裘不敵晨霜力老木爭號夜谷風
切勿重尋散闕夢朱顏改盡壯圖空

連日風霜可畏自
去梁州未嘗有此

也寒

道中病瘍久不飲酒至魚梁小酌因賦長句

我行浦城道小疾屏杯酌癯疥何足言亦復妨作樂此
身會當壞百歲均電電胡為過自惜憊臥困鍼烙未嘗
膾噉喁况敢烹郭索今朝寓空驛窗戶寒寂寞悠然忽
自笑頓解貪愛縛紅燭映綠樽竒哉萬金藥

宿魚梁驛五鼓起行有感

憶從南鄭客成都身健官閒一事無分騎霜天伐狐兔
張燈雪夜擲梟盧百憂忽墮新衰境一笑難尋舊酒
徒投宿魚梁溪遠屋五更聽雨擁篝爐

又

少時談舌坐生風，管葛奇才自許同。
閉戶著書千古計，變名學劍十年功。
酒醒頓覺狂堪笑，睡起方知夢本空。
它日故人能憶我，葛僊磯畔覓漁翁。

若耶溪有葛僊公釣磯

夢藤驛

倦馬投孤驛，一峯青壓門。
蕭條秋浦路，荒隔夜郎村。
地瘴霜常薄，林深日易昏。
百年常作客，排悶近清樽。

又

又入千山去真成萬里行
今年自成都八千餘里
赴行在又千餘里入閩履霜
常早駕秉炬或宵征古驛怪藤合荒波羣鴈鳴客中常
少睡歸夢若為成

梅花絕句

空谷佳人洛浦仙洗粧真態更嬋娟廣平莫倚心如鐵
撩起清愁又破禪

又

月中疎影雪中香口為無言更斷腸曾與詩翁定花品

一丘一壑過姚黃

曾文清公嘗問予梅與牡丹孰勝予以此答

又

折得梅花愧滿顏
文書堆案正如山
輸君一覺條然夢
長在清泉白石間

又

濯錦江邊憶舊遊
纏頭百萬醉青樓
如今莫索梅花笑
古驛燈前各自愁

又

蜀王小苑舊池臺江北江南萬樹梅只怪朝來歌吹鬧

園官已報五分開

成都合江園蓋故蜀別苑梅最盛自初開監官日報府報至開五分則府

主來宴遊

人亦競集

又

湖上梅花手自移

予所居在山陰鏡湖

小橋風月最相宜主人歲

歲常為客莫怪幽香怨不知

又

吾州古梅舊得名雲蒸雨漬綠苔生一枝只好僧窗看

莫售千金入鳳城

山陰古梅枝幹皆苔
蘇都下甚貴重之

又

探春歲歲在天涯
醉裏題詩字半斜
今日谿頭還小飲
冷官不禁看梅花

又

池館登臨雪半消
梅花與我兩無聊
青羊宮裏應如舊
腸斷春風萬里橋

又

今年真負此花時
醉帽何曾插一枝
漸老情懷多作惡

不堪還作送梅詩

去年在成都
嘗賦詩送梅

劔南詩豪卷十


謹案卷九第四頁後三行退之詩云刊本詩訛諸
今改

第十六頁前八行人生只似駒過隙刊本駒訛車
據史記改

卷十第四頁前四行及張翼德祠刊本翼訛益據
唐宋詩醇改

第六頁前七行飲散匆匆鷓首東刊本鷓訛躡據
唐宋詩醇改

第十八頁後四行未能踏層水刊本層訛增今改



總校官庶吉士 臣張能照

校對官庶吉士 臣章宗瀛

謄錄監生 臣任以依